

Bosna i Hercegovina
Federacija Bosne i Hercegovine
TUZLANSKI KANTON
KANTONALNI SUD U TUZLI
Broj: 03 0 U 023465 23 U
Tuzla, 28.03.2023. godine

Kantonalni sud u Tuzli, prilikom nejavnog rješavanja po sudiji pojedincu Predragu Krsmanoviću, uz sudjelovanje zapisničara Sadete Hadžismajlović, u upravnom sporu pokrenutom po tužbi tužioca **Grad Srebrenik**, zastupan po Gradskom pravobranilaštvu, ul. Radnička bb, protiv rješenja tužene strane: **Federalna uprava za geodetske i imovinsko-pravne poslove Sarajevo**, ul. Hamdije Kreševljakovića broj 96., broj 07-27-8-801/22, od 13.02.2023. godine, u upravnoj stvari **provođenja promjena u katastarskom operatu**, dana 28.03.2023. godine, donio je sljedeće:

RJEŠENJE

Tužba se **ODBACUJE**.

Obrazloženje

Protiv osporenog akta bliže opisanog u uvodu ovog rješenja, kao konačnog u upravnom postupku, tužilac je dana 23.03.2023. godine, putem Gradskog pravobranilaštva, podnio tužbu za pokretanje upravnog spora.

Iz navoda tužbe slijedi da se osporeni akt pobija zbog pogrešne primjene materijalnog prava, te nepotpuno i nepravilno utvrđenog činjeničnog stanja.

Iz sadržaja tužbe, kao i osporenog rješenja, koje je priloženo uz tužbu, proizilazi da je tim aktom uvažena žalba fizičke osobe – I.H. iz S., protiv prvostepenog rješenja Službe za geodetske i imovinsko-pravne poslove Grada Srebrenika, broj 03/5-30-00094/10, od 06.01.2011. godine, kojim je odlučeno o provođenju promjena u katastarskom operatu koji se vodi kod prvostepenog organa, i to na taj način što je na zemljištu označenom kao k.č. broj 151, KO ..., umjesto dosadašnjeg korisnika I.H., upisan M.H.

Prilikom prethodnog ispitivanja tužbe, sud je utvrdio da ista **nije dopuštena**.

Naime, odredbama člana 2. stav 1. Zakona o upravnim sporovima („Službene novine Federacije BiH“, broj: 9/05) propisano je da *pravo pokretanja upravnog spora ima pojedinac ili pravno lice ako smatra da **mu je upravnim aktom povrijeđeno neko pravo ili neposredni lični interes** zasnovan na zakonu, te pod istim uslovima pojedinac ili pravno lice koji su učestvovali u upravnom postupku radi zaštite svojih prava ili pravnih interesa (zainteresirano lice)*, dok je odredbama stava 3. istog člana propisano da *upravni spor može pokrenuti i nadležni **pravobranilac***, ali samo u slučaju *kada je upravnim aktom **povrijeđen zakon na štetu Federacije, kantona, grada ili opštine koju on po zakonu zastupa**, kao i u drugim slučajevima **određenim zakonom***.

U konkretnom slučaju u tužbi se **ne navodi** da je, predmetnim konačnim ili prvostepenim aktom, **povrijeđen bilo koji zakon na štetu Grada Srebrenika, kojeg predmetno Pravobranilaštvo po zakonu zastupa**, niti da je bilo kojim posebnim zakonom određeno da pravobranilaštvo u ovakvom slučaju, protiv naprijed navedenog konačnog upravnog akta, može pokrenuti upravni spor.

Pored toga, u tužbi se **ne navodi** ni da je **Gradu Srebreniku** povrijeđeno bilo koje pravo ili neposredni lični interes **zasnovan na zakonu**, niti da je **Grad Srebrenik** učestvovao u predmetnom upravnom postupku radi zaštite svojih prava ili pravnih interesa (kao zainteresovano lice), niti da se prvostepenim aktom **odlučivalo o bilo kom pravu** ili neposrednom, na zakonu zasnovanom, **interesu tužioca**.

Stoga se iz sadržaja tužbe, kao i sadržaja priloga uz tužbu, može zaključiti da za podnošenje tužbe od strane **pravobranilaštva**, **nije ispunjen nijedan od procesnih uslova** iz naprijed citiranih odredaba člana 2. stav 1. Zakona o upravnim sporovima.

Shodno tim odredbama, sud smatra da je, tužbu protiv predmetnog konačnog upravnog akta, zakonito mogao podnijeti samo **fizičko lice koje je podnijelo zahtjev** za provođenje promjena u katastarskom operatu, ali **ne i Grad Srebrenik**, odnosno predmetno Pravobranilaštvo.

S obzirom na izloženo, na osnovu odredaba člana 25. stav 1. tačka 1. i 3. Zakona o upravnim sporovima ("Službene novine Federacije BiH", broj 9/05), odlučeno je kao u izreci.

Z a p i s n i č a r:
Sadeta Hadžismajlović, s.r.
s.r.

S u d i j a:
Predrag Krsmanović,

POUKA: Protiv ovog rješenja nije dozvoljena žalba.